

Broj: 03-02-1139/2016
Sarajevo, 29.09.2016. godine

**PARLAMENT FEDERACIJE
BOSNE I HERCEGOVINE**

- Dom naroda -
gđa Lidija Bradara, predsjedavajuća ✓

Bosna i Hercegovina
FEDERACIJA BOSNE I HERCEGOVINE
PARLAMENT FEDERACIJE BOSNE I HERCEGOVINE
DOM NARODA
SARAJEVO

Primljeno: 30-09-2016			
Org. jed.	Broj	Priloga	Vrijednos
02 - 02 -		1751 / 16	10x

PREDMET: Mišljenje Vlade Federacije Bosne i Hercegovine

Poštovana,

U skladu sa članom IV.B.3.7.c) (III) Ustava Federacije BiH, a u vezi sa članom 157. stav 4. i članom 164 stav 1. Poslovnika o radu Doma naroda Parlamenta Federacije BiH („Službene novine Federacije BiH“, br. 27/03 i 21/09), u prilogu Vam dostavljam **Mišljenje Vlade Federacije Bosne i Hercegovine o Prijedlogu zakona o izmjenama i dopunama Zakona o porezu na dobit, koji je predložio Predrag Kojović, delegat u Domu naroda Parlamenta Federacije Bosne i Hercegovine s prijedlogom da se razmatra po skraćenom postupku**, a koje je Vlada Federacije Bosne i Hercegovine utvrdila na 71. sjednici, održanoj 29.09.2016. godine.

S poštovanjem,



Prilog: kao u tekstu

**Cc: Federalno ministarstvo finansija/
Federalno ministarstvo financija
gđa Jelka Milićević, ministrica**

Na osnovu člana 51. Poslovnika o radu Vlade Federacije Bosne i Hercegovine - Prečišćeni tekst - („Službene novine Federacije BiH“, br. 6/10, 37/10 i 62/10), a u vezi sa članom 157. stav 4. i članom 164 stav 1. Poslovnika o radu Doma naroda Parlamenta Federacije BiH („Službene novine Federacije BiH“, br. 27/03 i 21/09), nakon razmatranja Prijedloga zakona o izmjenama i dopunama Zakona o porezu na dobit, koji je predložio Predrag Kojović, delegat u Domu naroda Parlamenta Federacije Bosne i Hercegovine, Vlada Federacije Bosne i Hercegovine je, na 71. sjednici, održanoj 29.09.2016. godine, utvrdila sljedeće

MIŠLJENJE

Direktni porezi u Federaciji Bosne i Hercegovine uređeni su kroz dva propisa, i to Zakon o porezu na dobit („Službene novine Federacije BiH“ broj 15/16) koji uređuje oporezivanje pravnih lica i Zakon o porezu na dohodak („Službene novine Federacije BiH“, br. 10/08, 9/10, 44/11, 7/13 i 65/13) koji uređuje oporezivanje dohotka fizičkih lica (građana i samostalnih poduzetnika).

Zakon o porezu na dobit je usvojen u februaru 2016. godine i objavljen je u „Službenim novinama Federacije BiH“, broj 15/16, a stupio je na snagu 05.03.2016. godine. Ovim propisom se uređuje **oporezivanje dobiti privrednih društava i drugih pravnih lica**, a nikako oporezivanje dohotka fizičkih lica - građana, koje je uređeno Zakonom o porezu na dohodak.

Koncept Zakona o porezu na dobit se zasniva na oporezivanju dobiti pravnih lica kroz organizacioni oblik - privredno društvo, koji je uređen Zakonom o privrednim društvima („Službene novine Federacije BiH“, broj 81/15), a ne na konceptu oporezivanju djelatnosti. Diferencirana stopa poreza na dobit od igara na sreću predstavlja djelimični koncept oporezivanja dobiti kroz djelatnosti. Koncept oporezivanja prema djelatnosti nije preferirani koncept oporezivanja dobiti i nije zastupljen ni u jednoj državi u Europi.

Dalje, u obrazloženju prijedloga zakona obrazlaže se povećanje stopa poreza, ali sa aspekta oporezivanja dohotka fizičkih lica - građana, što automatski znači Zakon o porezu na dohodak, a ne Zakon o porezu na dobit. Tačnije se navodi da je praksa u zemljama Europske unije da je stopa **poreza veća na dobitke od igara na sreću, znači oporezivanje dobitaka od igara na sreću odnosno onih iznosa što igrač ostvari, a ne dobit privrednog društva**. Privredno društvo nema dobitaka od igara na sreću jer privredno društvo nije igrač.

Tačno je da se u pojedinim zemljama Europske unije stopa poreza na dohodak kreću do 70% te da primjena stopa ovisi od visine dohotka ili od vrste dohotka, ovisno koji koncept oporezivanja dohotka fizičkih lica je zastupljen.

Zatim dalje u obrazloženju prijedloga zakona, navodi se: „*da su države unutar EU shvatile da igre na sreću ne mogu imati jednaku **poreznu osnovicu kao redovna primanja za rad***“ što potvrđuje da je obrazloženje namijenjeno za uvećanje stopa poreza, ali stopa poreza na dohodak fizičkih lica, a ne poreza na dobit privrednih društava. **Primanja za rad predstavljaju kategoriju dohotka građana koja je oporeziva porezom na dohodak**, a koje je prema Zakonu o porezu na dohodak klasifikovana kao prihod od nesamostalne djelatnosti.

Shodno svemu navedenom, mišljenja smo da predložene izmjene i dopune Zakona o porezu na dobit ne treba prihvatiti jer narušavaju koncept oporezivanja koji je usvojen u već postojećem poreznom sistemu.

V. broj: 1795 /2016
29.09.2016. godine
Sarajevo



PREMIJER

Fadil Novalić